



Te Reo Māori – ki te kōrerotia e te whānau e kore e ngaro

Anei ētahi aki hei tautoko i a
koutou ko tō whānau hei
ākonga reo Māori

KŌREROTIA TE REO MĀORI KI Ō TAMARIKI



1. Whakawai i te haumarutanga o tō ake kāinga i te taha o tō whānau me ō hoa. Kia āhua tau anō koe ki te whakamahi i ngā kīanga me ngā kupu, katahi ka rite koe ki te whakamātau i aua kōrero ki mua i ētahi atu.
2. Hopukina ngā hōtaka reo Māori i te pouaka whakaata. He tino pai tēnei mā ngā kōhungahunga kei te kāinga ia rā, ia rā. Whakanuia ngā hua mā te pātai tētahi ki tētahi i te reo Māori e aha kē ana i te hōtaka.
3. Whai wāhi atu ki ngā ngohe ahurea Māori, pēnā i te waka ama, te kapa haka me te mau taiaha, kia rite tonu te haere. Mā te whai wāhitanga atu e whānui ake i ngā wāhi e taea ai e koe te kōrero Māori.
4. Waihanga rauemi ahurei tonu hāngai ki tō tamaiti me tōna tuakiri, tōna tūāhua. Pātai ki tō tamaiti ki te tā pikitia o tōna maunga, o tōna awa. E kite rātou i a rātou anō e whakaata mai ana i roto i te rauemi, mā reira e noho motuhake ai ki a rātou anō.
5. Whakaatu i ngā tūmomo taiao ki tō tamaiti hei wāhi e taea ai e kōrua tahi te kōrero Māori. Kei roto pea i te waka, i ngā wā kai, i te hokomaha rānei, e ako ai tō tamaiti he tino wāhanga o tō ao te reo Māori e āhei ana hoki te whakamahi i ngā wāhi katoa.



MĀTE WHĀNAU HEI TAUTOKO I NGĀ MĀTUA

1. Ehara i te mea me tāngata matatau rawa ki te kōrero Māori tō whānau hei whakaako i te reo Māori ki ō tamariki. Whakatenatena i tō whānau ki te whakamahi i ngā kupu, i ngā kīanga hoki e mōhio ana e tō whānau i te taha o ō tamariki. Ahakoa iti he pounamu, ahakoa he aha te āwhina e taea ai he āwhina nui tonu tērā ki ō tamariki.
2. Ia wā ka kōrero Māori tō whānau ki ō tamariki, e rua ngā whakaakoranga: tuatahi kei te whakaako i te reo Māori ki ō tamariki; tuarua kei te whakaako hoki rātou he āhuetanga te reo o ia rā, o ia rā, he whakahirahira anō hoki te reo Māori i te kāinga.
3. Me mōhio ki te wāhi nui o te whānau i te whakaoranga me te hauoratanga o te reo Māori.
4. Kōrero ki tō whānau mō te hiranga o te kōrero Māori i te kāinga, me ō whakaaro mō te whakakaha ake i tō kōrero Māori i te kāinga. Kōrero mō tētahi mahere reo māu, mā tō whānau hoki e taea ai e te katoa te whai wāhi atu ki taua mahere (mā te kōrero Māori, mā te tautoko rānei i hunga e mōhio ana ki te reo).
5. Ko tētahi o ngā ara ako o te tamaiti ko te tāruatanga o te kōrero, nō reira kia kaha ki te whakamahi i ngā kīanga i te reo Māori i tō rātou taha ia rā, ia rā. Mā konei e ako anō ai hoki koe.

I ahu mai ngā kōrero mō ngā tohutohu i te pukapuka a Te Puni Kōkiri 'Kei Roto i te Whare' – Māori language in the home. I whakaritea tēnei pukapuka hei āwhina i a koe me ngā whakatau mō te ako me te kōrero Māori i te kāinga i roto i tō whare.

Ka taea te tono kape **UTUKORE** o 'Kei Roto i te Whare' i tpkinfo@tpk.govt.nz

- | | |
|---|--|
| P 04 819 6000 | W tpk.govt.nz |
| F 04 819 6299 | K facebook.com/tepunikokiri |
| E info@tpk.govt.nz | F tpk.govt.nz/kokiri |



Te Puni Kōkiri
REALISING MĀORI POTENTIAL

'Kia ita!'
Te Taura Whiri i te Reo Māori
MĀORI LANGUAGE COMMISSION

